

'Tak boleh pakai lagi' sedia jumpa 'burung unta'
Malaysiakini.com
October 6, 2010

Tun Dr Lim Keng Yaik, yang melepaskan jawatan penasihat parti Gerakan semalam, berkata beliau sedia menemui presiden parti itu, Tan Sri Koh Tsu Koon untuk mendengar penjelasannya tentang isu yang menimbulkan perbalahan antara mereka walaupun buat masa ini beliau tidak terfikir untuk mengubah pendiriannya.

Lim dipercayai mengambil pendirian itu berikutan keputusan mesyuarat Jawatankuasa Kerja Pusat Gerakan semalam yang menolak peletakan jawatan beliau sebagai penasihat dan mahu Koh mencari penyelesaian terhadap isu yang timbul antara beliau dan Lim.

Kini, semua pihak ingin melihat sama ada Koh mampu memujuk dan kembali menjalin hubungan harmoni dengan mentornya itu.

Sumber parti itu berkata beberapa pemimpin mencadangkan kepada Koh agar beliau mengadakan perjumpaan dengan Lim selepas Mesyuarat Agung Luar Biasa (EGM) parti itu di Pulau Pinang pada 10 Oktober ini untuk meredakan keadaan dan menetapkan rancangan peralihan kepimpinan parti itu.

Bagaimanapun, beberapa anggota parti itu berkata Koh mungkin menghadapi laluan sukar untuk berdamai dengan bekas orang kuat Gerakan itu berikutan kenyataan Lim pada Isnin yang seolah-olah melancarkan perang terhadap beliau.

"Saya mahu lihat sama ada beliau berani datang berjumpa saya atau terus berperangai seperti burung unta yang menyembunyikan kepalanya dalam pasir.

"Kalau anda rujuk kepada kenyataan lima perengannya semalam, tiga perenggan pertama menunjukkan beliau (Koh) masih cuba mewajarkan perangnya seperti burung unta itu," katanya.

Ahli politik veteran itu juga berkata Koh tidak pernah menghubunginya selepas perjumpaan terakhir mereka lebih dua minggu lalu.

Seorang pembantu Koh bagaimanapun berkata Menteri Di Jabatan Perdana Menteri itu telah cuba menghubungi Lim dan anaknya, Lim Si Pin yang juga Ketua Pemuda Gerakan sejak Isnin tetapi tidak berhasil.

Koh enggan mengulas tentang tindakan Lim yang melabelkan beliau sebagai burung unta tetapi menurut beberapa pemimpin parti, beliau amat sedih dengan kenyataan terbaru bekas presiden Gerakan itu bahawa parti itu hampir hancur di bawah kepimpinan sekarang.

"Kenyataan tentang burung unta itu tidak mengecewakan beliau (Koh). Tapi kata-kata bahawa parti ini kini di ambang kehancuran, sangat mengecewakan beliau.

"Beliau tak boleh menerimanya. Oleh itu, kami tak pasti sama ada beliau akan sedia berjumpa dengan Lim," kata Setiausaha Agung Gerakan, Teng Chang Yeow.

- Bernama

